

Weh Yu Ga Pahn Yu Krismos Lis?

1. Fos ting mi grani doz du: Rip owt wi oal maali ahn put dong nyoo wan. Fu Krismos, evribadi laik noa seh dat dehn floaboad luk nyoo, er az nyoo az ih ku luk!
2. Wid nyoo maali, fu shoar yu wahn waahn kleen op di hows gud gud-wan. Waip dong di waal ahn spary waata haad haad pahn dehn doti skreen soh mek dehn geh kleen ahn breez bloa chroo gud gud-wan.
3. Palish op wi priti priti boad fernicha! Ahn sohn a wi maita waahn paynt op di plays fu Krismos (Dis maita meen seh, laik di layt Mista George Gabb doz seh, dat wi put paynt pahn oal boad...goh hed...paynt op!).
4. Afta wi kleen, wi eet op! Soh wi soak wi froot dehn fu mek blak froot kayak ahn wait froot kayak. Den wi bayk ahn bayk ahn bayk ... lait kayak tu! Sohn a wi pikni noh laik di froot kayak; dehn jos waahn lait kayak!
5. Memba wi faamil ahn wi fren dehn. Bai er mek gif fu gi dehn, ahn moas impoatant: Mek taim fu deh wid dehn!
6. Myoozik: brok dong! akaadyan, gitaar...lee jromz.... brokdong... sambai! Ahn wi salibrayt as wi Garifuna Bileezyan groep kohn rong wid jankunu daans!
7. Noh figet fu prayz Faada Gaad: Jeezas da di reezn fu di seezn!
8. Seh ‘Tenk Yu’ evri maanin wen yu wayk op!